

四庫全書

集部

欽定四庫全書

集部

中州名賢文表卷十七

詳校官中書<sub>臣</sub>瞿照

助教<sub>臣</sub>常循覆勘

總校官庶吉士<sub>臣</sub>朱 鈐

校對官編修<sub>臣</sub>盧 燧

謄錄監生<sub>臣</sub>李世麟

欽定四庫全書

中州名賢文表卷十七

明 劉昌 編

馬文貞公

騷賦

發淮浦

發淮浦兮遡黃流  
鼓船舷兮極浮游  
雲英英兮天已秋  
攬芙蓉兮艤芳洲  
酌吾酒兮樂無憂  
懷佳人兮結綢繆  
我思操

八風兮淪淪政宣兮音通律節兮應同臣商兮君宮龜  
之山兮松有枝美之里兮田有萊天不喪兮何悲願復  
願兮令我思

傷已賦

嗟余生之多憂兮幾顛踣而數窮誓續言以自見兮力  
遲古之高風呼芟龍以駕我兮倅芟使使爲期何九稼  
之不一獲兮尚偃蹇而如茲豈剗剗之有不善兮將世  
德之下賢薦芻茭於宗器兮綴履綦以璣璿封敦旒以

塊秦岱兮謂汎濫其莫涯冠髻童以弁冕兮問禮意而  
莫支決大疑於淫鬼兮憑巫傳以度揆願聖言之鞿勒  
兮指網維爲械意憫相道之無朋兮去一髮之幾希扼  
吾車之莫騁兮膠吾口而難辭懲前悔之不憚兮配古  
道其或可思一旦舍此而改圖兮念後余之病我日浚  
惡以啓堙兮患世之屏經而好權遭歧蹊之多迷兮世  
或謂其固然抱昌辭以適與我兮俟來學以偕行辨百  
家之糾紛兮孰察余之衷情亂曰我涉大波孰爲航兮

我載大塗孰爲箱兮古聲皇皇金石之揚兮世無佞兮

悠然閣賦

爲周南翁作

舒吾眺之落落兮覲寥廓之無跡會冥冥之遐思兮契  
萬品之攸職擬大化而罔象兮悼世德之圓形聿逍遙  
而容與兮泊乎游乎泰清是有當於吾衷兮表吾廬以  
自肆騁余馬於析津兮崇吾屋乎江汜揭高躅於古道  
兮追前修其或然偉一世之君子兮又贈之以蘭茝曰  
余未有知兮何私意之彷彿懿夫子之悠然兮殆反余

乎空谷

制誥

遣使巡行詔

朕祇承洪業夙夕惟寅凡所以圖治者悉遵祖宗成憲  
曩者屢詔中外百司宣布德澤蠲賦省刑賑恤貧乏思  
與黎元共享有生之樂尚慮有司未體朕意庶政或闕  
惠澤未洽承宣者失於撫治司憲者怠於糾察俾吾民  
重困朕甚憫焉今遣使宣撫分行諸道案問官吏不法

詢民疾苦審理冤滯凡可以興利除害速宜舉行有罪者四品以上停職申請五品以下者就便處決其有政蹟尤異暨晦跡於丘園才堪輔治者具以名聞咨爾臣庶體予至懷

太保左丞相封贈三代制

匡時靖難資大策於元臣崇德報功覃湛恩於累葉奉常議禮輿壤定封具官某故曾祖服勤侍衛秉信功臣太傅銀青榮祿大夫上柱國梁國公謚敬簡塔瑪噶圖



秉質無華詒謀有永早備鈎陳之列式昭析木之祥行  
善慶於曾孫篤忠貞於熙代使宅百揆光於前人於戲  
開國浚郊具儀文於鈇鉞承家新鄭紹世美於衣冠錄  
我絲綸告爾寔宥可追封陽翟王

朕論功定賞念扞衛之多艱推慶行封俾覃延於三世  
懿彼靜女配予先臣具官某故曾祖母梁國夫人呼圖克  
章早飭壺儀克承宗事不假詩書圖史之戒素嫺織紵  
組紃之功迪美萃於曾孫發祥殷於令族新廟奕奕斷

松柏於析津原田每每畫封圻於梁土龍章有赫象服  
來歆可追封陽翟王夫人

朕獎元勲恩推舊德濟其世美詔厥孫謀屬大業之中  
興賴名藩之外援追封奕葉實著彝章具官某故祖父  
守忠翊正效節宣力功臣太師金紫光祿大夫上柱國  
梁國公謚莊順青海質稟淳龐躬行愷悌橐鞬宿衛久  
服勞於王家弓冶承傳遂開先於相閥方乾坤之清謐  
俾綸綍之渙頒用禮勸忠書功旌善於戲伊洛瀍澗樂

哉魂魄之遊山川土田衍爾烝嘗之奉昭茲來裔祐我  
丕基可追封河南王

命婦朝后彤管著於女箴令妻相夫鞶絲陳於內則賈  
惟淑德嬪於名門具官某故祖母梁國夫人呼喇章毓  
質柔嘉修容婉婉久襲祥於世業當擢秀於孫枝爲國  
懷材贊予茂烈雲翔鸞誥俾澤漏於泉臺飈轉魚軒想  
神遊於梁苑尚貽多祐福爾後人可追封河南王夫人  
惟王建國必崇德以報功自天降康乃生賢而靖難茲

眷元臣之懿宜推先正之褒具官某故父懷忠濟美積  
德崇慶功臣大師開府儀同三司上柱國特進河南王  
謚忠懿濟濟哩蘊善弗彰紹謀斯永爲郎執戟夙多宣  
力之勤有子克家益勵教忠之訓定中興之大策立不  
世之殊勲匪衍王封曷稱朕意於戲河山帶礪式藏盟  
府之書乾坤珍符期篤熙朝之祐格思英爽歆此寵光  
可追封鄭王

朕惟元臣克相中興之業母有令子宜膺崇秩之封稽

諸彝章廣我孝治具官某故母河南王夫人揚珠濟農  
夙嫺姆訓綽著婦功奉筐筥於烝嘗節珎璜於夙夜內  
政素勤於在饋慈訓尤切於斷機德啓閨門光資邦國  
倬茲鄭圃乘翟茀以來遊嘉彼召南賦鵲巢以行化俾  
頒綸誥用賁泉扃可追封鄭王夫人

平章伊蘇德爾封贈三代制

夫用之紓者積必厚行之徐者力弗殆斯道之常匪曰  
責報也平章伊蘇德爾曾祖父贈定威佐運功臣榮祿

大夫司徒柱國追封曹國公謚忠定布色出於華族夙  
奮材武從我太祖皇帝親屬橐鞬崛起戎列威行方國  
戰功良多及定隴陝斬將搃旗臨敵致死大節赫然傳  
不云乎活千人者有後茲爾數世之遠傳家孫曾愈碩  
大光顯又得議封於禮官博士非用兵有活人之德而  
然乎命頒異數開國曹南中土奧壤襲慶濟美可示爲  
將者之勸可贈定威佐運功臣光祿大夫司徒上柱國  
追封曹南王謚忠定

古外命婦朝后是則婦官尚矣平章伊蘇德爾曾祖母  
追封曹國夫人塔本劬勞慈育生子克家戰勝攻取丕  
佐興運議禮制度于爾有封從夫之爵曹國小君象服  
翟茀歆茲追寵可追封曹南王夫人

朕稽古爲治立國以禮故臨御四海永慕祖宗創業之  
艱難美其興運佐命之臣厚厥世賞以訓臣鄰矧其胤  
裔又有能全其終始者乎平章伊蘇德爾祖父贈宣忠  
靖遠功臣光祿大夫中書右丞相柱國追封曹國公諡

卷十七  
桓毅額里根蚤備宿衛分徙賢王前驅先登戡定河外  
俾金爲墟而宋社遂以屋者蓋爾戰多之力焉異姓封  
王於爾爲寵矣英爽不亡尚保爾世哉可追封宣忠靖  
遠佐運功臣金紫光祿大夫中書右丞相上柱國追封  
曹南王謚桓毅

夫恩禮覃於百官則先近臣漏澤施於九原則觀來者  
平章伊蘇德爾祖母追封曹國夫人默呼早嬪高門無  
違宮事克相君子爲王虎臣又有聞孫贊子景運俾有



司議封乃追命爾爲王夫人以曹南之田爲脂澤之賦  
尚歆寵渥益行廟食可追贈曹南王夫人

先王有崇德報功之制豈曰觀美蓋以旌善而勸忠也  
平章伊蘇德爾父光祿大夫中書左丞相先贈協謀定  
遠佐理功臣太師開府議同三司上柱國曹國公諡宣  
武阿喇罕生長富貴宴安而無子弟也習勝衣荷戈奮  
身前驅維時世廟觀兵江滸貔虎百萬之衆謀臣如雲  
乃能立功名於其間北征叛王轉戰千里南殄奔君樹

旗海嶼勲勞顯著寵賚便蕃我國家於君臣之道可謂至矣朕不聞鼓鼙猶思將帥況爾有後爲予蓋臣中興之初率兩河將士戮力介冑之間大臣以聞乃隆推恩之禮上及於爾三世焉曹南之郊桑穀沃壤開國稱王人臣極位爾克有靈歆我綸命可贈推誠宣力定遠佐運功臣太師開府儀同三司上柱國追封曹南王謚忠宣

我家經營南國之初尚賴膂力之士材武之臣克成大

業勲勞之蹟皆已銘於太常矣又且尊顯其身以至於  
室家之有慶者茲非典禮之懿乎平章伊蘇德爾母曹  
國夫人托多淑慎端惠夙配君子尊召南之化而象服  
是稱施孟母之教而訓忠有言卓茲令器爲朕虎臣臨  
御之際褒錫宜先開國曹南以衍脂澤之賦煒其榮哉  
賁爾寔宥可追封曹南王夫人

君子不昵於宴安之私以能成其功名者亦嘗資於內  
助焉平章伊蘇德爾妻曹國夫人庫庫倫幽閑端懿雞

鳴而起相其宗事婦德有稱沒從夫爵啓封曹土魚軒  
象服裕爾後昆可追封曹南王夫人

太傅圖魯封諡制

帝垣台位象已著於上元太傅師臣官尤崇於常秩有  
懷舊德追錫眞王太傅圖魯蚤陟華階懋脩素履小心  
翼翼文昭持橐之班終日乾乾勞著屬橐之績宗親入  
覲儔相是資耐金不罰於諸侯英蕩悉同於元會樞機  
宥府奠軍國於人寧鼎鼐台司贊陰陽於化育踐駁禁

近閱歷歲年持風紀於臺端肅官箴於朝著天不慙遺  
朕用盡傷思答茂勲爰申卹典於戲昨爾茅土俾開國  
於廣陽播予絲綸尚流澤於幽壤諒茲靈爽服此寵章  
可贈懷忠秉義昭宣弼亮功臣太師開府儀同三司上  
柱國追封廣陽王謚清獻

男位正家恒有資於內助女師結帨庸作配於上公獎  
我舊勲迨於佳儷太傅禿魯妻輝和氏幽閑毓德婉孌  
賦姿象服是宜奉蘋蘩於祭祀彤管有煒謹珎瑤於箴

規懋著婦功克相宮事痛所天之先殞誨厥嗣以益嚴  
石窳啓封賜廣陽之大國容臺議禮贊召南之夫人享  
爾高年欽此異數可封廣陽王太夫人

右丞阿勒坦封謚制

朕以崇德報功之制聖王建國之皇圖論名立謚之稱  
昭代褒賢之鉅典用光綏寵俾洽臣鄰右丞阿勒坦少稟  
粹姿蚤登膺仕周廬星列入陳扈蹕之勞專驛飈馳來  
上屯田之奏恩威襲蠻夷於冠帶忠孝擴詩禮其箕裘

錫類著乎家邦浚明勤乎夙夜貂蟬七葉飾躬不瀆於  
華鮮弧矢四方迪德彌彰於懿美篤生令器丕佐明時  
聿殫嘉猶晉參大政橫經內殿矢茲密勿之言熙載外  
朝體朕都俞之意有司考禮於汝推恩爰頒渙號之辭  
式副光榮之志於戲丞相一品英靈尚克以歆承泰階  
六符善慶益延於似續錄諸告第欽我贊書可贈秉義  
效忠著節佐治功臣太保開府儀同三司上柱國追封  
特進趙國公中書左丞相謚貞孝

周南正始教化被於閨門趙國䟽封寵榮光於泉壤爰  
稽彝典用獎有官右丞阿勒坦妻唐古氏毓質柔嘉脩儀  
婉婉來嬪閱閼蚤乘翟茀之車克相夫君益著鵲巢之  
德篤生令器褒作名臣服慈訓之不忘迪嘉謀之入告  
推恩追錫體人子報本之私考禮飾終示我朝廣孝之  
治尚昭懿範歆此告詞可封趙國夫人

表牋

賀元旦表



皇極建中育嘉生於世運乾元資始衍嗣歲於人時叶  
氣開先純陽肇德中叙道全居正功洽體仁坐宣室以  
受釐百神奉職御明堂而布政萬國咸寧勾陳環列於  
端門庭實駢羅於文陛臣某等塵聯烏府迹邁鵷行進  
封事於銀臺慙稽袞補紀卜年於寶厯欣對嵩呼

正旦賀興聖宮表

帝厯開天祥發貞元之會母儀法地源疏河海之涵百  
物順嘉四時叶序中叙陰功庀世懿德承乾肇聖緒於

姜嫄彌虔祖武刑徽音於太姒益衍孫謀茂綏獻歲之  
祥膺保履端之吉臣某等遭逢世泰綴列朝行官備中  
臺王朔願敷於錫福慶隆長信民功仰荷於資成

賀建儲表

伏以天潢毓德聿開聖嗣之隆廟祐承祧爰啓儲闡之  
慶祥臻泰道福集昌朝中叙迪德堯仁躬親舜孝日麗  
乎天而明兩益紹重華帝出乎震而洊雷彌嚴繼體乃  
眷元良之懿式膺監撫之崇臣某等備立烏臺趨朝雞

曙前星奏瑞載瞻青輅之旂太極含元第衍黃圖之籍  
賀春宮箋

甲觀儲祥肇泰始含章之慶春宮正位受少陽體德之  
尊神器有歸宗祧是賴中叙生知忠孝夙稟溫文躬問  
侍之勤德已昭於帝胄膺監撫之重道允叶於皇猷承  
華克紹於丕基建本方隆於大寶臣某等忝居侍從喜  
際文明鶴禁景遲願早親於四學雲門樂奏期介祉於  
三宮

監修國史賀正表

瑤圖撫運紹開致福之祥寶歷乘時肇序體元之始大  
鈞播物淑氣迎和中敘道洽古今性資文武潛心帝王  
之學聖敬日躋合德天地之仁皇猷允塞歲事啓成於  
農扈治功端本於王正臣某等辱備台司監綜史氏觴  
稱萬歲樂快覩於龍光書載三墳期永垂於狐筆

賀立后建儲表

冊建中宮體黃裳之居正祧承長器仰蒼震之儲祥國

本以寧壹儀攸敘中敘聖資神武玄德欽明美教化厚  
人倫允叶相成之業奉宗廟承祭祀丕昭繼照之明慶  
洽三宮懽騰八表臣某等職塵仙館班簞帝廷運值上  
元盛典並行於吉日天開泰定顯謨已著於初年

箴銘

書櫝銘

農善鋤鋤匠利斧斤其器既精其績惟勤以食以居可  
必於懽士不農匠崇文著書濟濟閒燕明世所須秘冊

於櫝經史百家內沐其澤外芬其華漆梓勒銘以告弟  
子我承庭訓敢不礪爾惟天精明不啻於人惟物淫昏  
乃迷厥真匪聖匪賢曷先我覺匪訓匪辭我孰從學曰  
我祖考奕葉顯揚革我世俗維文是將迨茲百年士而  
不民我辭諄諄庶大爾身

書几銘

木也材漆也堅工之良其成器也完吾克有之利於燕  
閒之觀

居室銘

苟居室也敬則疇之可訂苟學古也專則疇之不傳有  
幽者神有穹者天將寵綏之爾益勉旃

羈然亭銘

維茲世人時化物遷雜沓紛至攻於吾前吾乃應之而  
一羈然其羈者何不吳不教不震不謨順受維嘉豈嘻  
笑之怒者耶

龔友輔纘古齋銘

古有道載諸辭我績之徵於斯維友輔篤古學予爲銘  
聽母藐

舟箴

伐木於山既斧既鏹於綴以穎金於屋以編管杵堊縷  
枲研桐之脂塗於木間以禦外波不觚而剗不趾而趨  
南國利之以載以居不車不廬越紀彌章矢溺溷濁汙  
海若之宮馮夷乘顛軒輊上下萬緇千纏不施其功卒  
不思改圖由是言之水豈不仁哉



題跋

書翟太素彈琴詩序後

古堂上樂皆亡獨琴在今之琴雖盡非古意然猶愈於  
亡也省菴周先生謂余言汴士翟太素雅善鼓琴羣髦  
方聲其工被歌詩間子盍賦之予悼道不傳續綴事方  
殷不能爲韻語俾太素絃之省菴周先生其無庸病我  
跋夫子擊磬圖

天地日月不容繪畫而松雪翁寓意於翰墨之中吾固

知其歎荷蕢之非真知聖者也

記御史臺題名後

天厯初有制命御史臺具石題名聖言渾灝有訓有戒  
天聽明達照知物情而文字簡易蓋堯舜都兪之音也  
天地之大日月之明何德以象之臣趙世延既承詔爲  
文至順三年九月日臺臣等謹敷宣德意列載如上維  
時長貳曹屬之次仍列於下後之來者尚徵於始而繼  
之也且人之善惡咸在是亦懲勸之義不可廢也嗚呼

慎之哉

題松廳事橐略後

昔祖常承乏察院初官未熟時事往往篤信古道動輒  
得咎言秦州山移之變則得奉祠太社論特古斯丞相廢  
法擅權則謫官開平嬰虎口之毒擯斥五年幸遭遇天  
日清明更張化絃凡是同惡姦狀顯露善類彙進衆賢  
登朝而祖常忝備召用待罪詞垣暇日偶繙閱書簾見  
有章疏舊橐數十紙因繕寫成一編祖常詎敢賣直要

譽庶亦存愛君憂時之萬一云耳名之曰松廳事彙略者明其與同官論列者皆不記也至治三年端陽日浚儀馬祖常識

跋誠求堂詩

得龍之嗜龍可以叅知馬之畏馬可以舞彼含氣之不得靈而我得其精寔用乎誠沉靈於彼者可不以茲求邪

章疏

請慎簡宮寮疏

伏觀延祐三年十二月十九日皇太子正位春宮百司  
上箋稱賀禮畢欽惟列聖繼統治功大洽文恬武熙百  
年於茲矣聖天子高覽古今軍國之幾蚤建天下之本  
日月之明無以比德皇太子殿下溫文仁孝天賦美資  
急宜招延天下碩德雅望文采博通之士朝夕起居以  
侍左右輔養懿美薰陶沖和三代紹述厥要惟茲傳云  
成王始爲太子也太公爲師周公爲傅召公爲保伯禽  
唐叔與遊目不閱淫豔耳不聞優笑居不近邪庸及爲

君也血氣既定游習已成雖有放心不能奪已成之性  
今皇太子殿下春秋鼎盛神明日彊道德之言禮樂之  
事當豫講而速親其方不過求賢而已伏乞今後議行  
建立宮寮之時公集大臣覈求名實相副端能調護羽  
翼儲闈之才以係四海之望所謂下官臣僕亦宜精擇  
而不可雜以商賈冗瑣之流天下休戚之源實在於此  
卑職草萊賤士誤被拔擢敢不盡言少紓重責

請量移流罪

禮樂刑政治國之具有一不修則弛法度欽惟國朝有  
天下以來不嗜殺人仁覆生齒涵濡煦育洽然太和而  
於用刑尤切慎重然伏見近年頒降德音中間屢無量  
移流徙之文竊慮聖人愛物之仁推恩未悉有傷至化  
夫大辟死罪或被赦原釋然歸保妻子而減死流罪竟  
無寬宥不得生還里閭此豈法之平允哉乞今後如有  
例合長流罪惡別請定擬長流條例其不長流者亦請  
驗情輕重度地善惡每遇恩澤輒行量移如蒙檢舉典

故施行則天下生靈幸甚

辨王左丞等

竊聞傳云王臣蹇蹇匪躬之故國家實賴焉夫便佞辨給徒利一己視國與民漠然如無情者國家何補哉伏見中書左丞王伯宏前中書平章政事拜珠曩在政府常以直言正色力持公平與權臣特穆爾德爾抗論可否若此二人其國家緩急之際剛毅不屈信可倚仗宜從憲臺間奏將二人擢實機要不令外補實社稷之計



論執弓矢禁例

近承奉照會該欽奉奏准禁約漢人百人以上執弓箭打圍處重刑百人以下流遠方微及一兔之獲罪各有差竊謂作法有名垂訓無弊且今日見行條例已有禁漢人弓矢之科又有禁諸人聚衆之制若復以上項打圍處重刑等例錯綜而網羅之誠恐愚氓舉足陷罪難避易犯實爲可憐而朝廷受禁人捕獸免之名尤爲非美宜從合干部分檢舉禁衛園地舊規遵守施行不勝

幸甚

論秦州成紀縣等處山移事

伏見議遣大臣馳驛陝西賑恤災異祈謝岳鎮卑職叨冒言路敢有愚昧謹用敷請夫山移大變實惟天譴是爲不動之物而動大臣以下各宜辭避官位推議賢能畏懼修省表奏待罪庶乎對越上帝而爲縣延丕基非但遣使祈謝賑恤一方一隅而可彌災也竊又聞之應天以實不以文昔師曠對晉平公石言之語載在方冊

世世爲監今山移之譴理無虛示豈非在野有當用不用之賢在官有當言不言之佞所以感召不動之物而動毒延庶民甚可哀痛且端本首善在乎幾微萬物咸遂百職共宜然後高下奠位山川宅寧伏乞憲臺早爲敷奏任用賢才相應

舉翰林待制袁桷等

上件官學問究極乎羣經文章粲著乎當世修國史則足以宣揚聖業代王言則足以潤色皇猷久次翰林屬

官誠爲淹抑翰林修撰陳觀性稟端方操履嚴慎使之  
居糾察之地必能振舉職業不苟於事前國子司業吳  
澄知經博古學術淳深求之海內可謂名儒如蒙擢置  
兩院以備訪問相應

記序

小石山記

岳鎮之列居四方其間出雲氣神物變化靈異以之順  
成年穀滋益品類者大矣至於巖壑之美巖穴之秀木

榮泉清珍禽異獸之所託依往來仙真高人之所棲宿  
是皆有以寓游觀樂放逸在君子之所不可廢者也淮  
以南諸山石礦而不瑩余得小如盎者一鑿器實水植  
之其中亦磊落峻拔含蓄雄偉可喜也彼雖不能如岳  
鎮之大出雲氣光景神物變化要受封祭然世或欲捷  
淇竹以塞河決鍊五色以補天漏則予斯石也其能無  
尺寸之功歟

石田山房記

桐柏之水發爲淮東行五百里合潯潢山谷諸流左盤  
右紆環繚陵麓其南有州曰光土衍而草茂民勤而俗  
樸故贈騎都尉開封郡伯浚儀馬公實嘗監焉公之子  
祖常少賤而服田於野以給饘粥鄉之人思慕郡伯之  
政念其子之勞而將去也迺爲之卜里中地函其葺屋  
而俾就家焉屋之側有崇丘可六七丈溪水旁折而出  
岸碕之上嘉樹苞竹薈蔚蔽虧前爲木梁梁溪而行周  
垣悉編菅葦門屋覆之以茨歲里鄰酒食往來牛種田

器更相貫貸寒冬不耕其父老各率子若孫持書箴來  
問孝經論語孔子之說其耕之土雖磽瘠寡殖不如江  
湖之沃饒然猶愈於無業也祖常者因樂而居焉於是  
名其屋曰石田山房且自爲記與圖以屬當世能言之  
士請爲賦詩異日使淮南人歌之

### 小圃記

余環堵中治方一畛地橫縱爲小畦者二十一塍崑崙  
奴頗善汲晝日絙水十餘石井新浚土厚泉美灌注四

通陽春土脈亦墳起古所謂滋液滲漉何生不育者信  
矣哉雜蘆葍蔓菁蔥薤諸種布分其間柵以糝薪限狗  
馬越入蹂躪圃在前時爲故主馬廐土有糞合水之膏  
澤併漬之後菜熟芣羹以侑廩米之饋餽吾於世資蓋  
寡取也如是可日計矣學子汪琬曰鑄鐵作齒綴於橫  
木使土平細尤宜菜余謂不然土之力完則殖繁若力  
盡則亦不殖矣因爲小圃記

上都翰林分院記



天子歲省方畱都丞相侍省中率百官咸以事從或分  
曹釐務辨位考工或陪扈出入起居供張設具或執橐  
鞬備宿衛或視符璽金帛尚衣諸御物惟謹其爲小心  
寅畏趨走奉命罔敢少怠而必至給沐更上之日迺得  
一休也惟詞臣獨無它爲從容載筆給輶傳道路續食  
持書數囊吏空牘旬日不一署文書夙夜雖欲求細勞  
微勤以自効而亦無有然後知上之人不欲役其心使  
之研精於思慮而專以文字爲職業非如衆有司務之

集事爲賢者也至治三年汝陽曹公子真分直學士院  
實應從行祖常攝官待制聯屬以偕上日懼譴薄無以  
稱其官幸遭逢國家治康內外清謐臣鄰廉恥不煩訓  
誨蠻夷懷柔不待約束所以敷宣播告之辭猶慎且簡  
間爲民爲歲而祠其詞之祝亦不誣神而夸故其意質  
而文又寡是以益積其蘊蓄而不得肆發而爲歌詩以  
形容國家太平之功乃更相與樂其秩之美而憇其被  
光寵於明世也吾徒之服是選者良亦榮矣夫良亦貴

矣夫可不研精於思慮以俟上之召必蹈渾噩之實而  
列陳之則庶乎不戾於躬也不戾於躬則於古也近矣  
志諸壁因以存故實云

禮部合化堂題名記

凡職事官悉有司也惟六官隸丞相府分領庶務頒降  
文書春官典禮古秩宗之職或謂之南省或謂之儀曹  
其視五官非獨有司之事焉天子祠郊廟則贊相中書  
論制度則與議朝覲會同之班簿聲名文物之品節洛

辨位之名數稽載籍之推本莫不於是詳定焉褒崇旌  
異勸善成俗報德尚賢尊右儒學之義咸敦大而涵煦  
之優柔而裕養之生而不殺之道存焉與夫饗膳醴齊  
之薦於上餼牽牲牢之饋於下以仁睦親以德體物分  
吏以上四方之職貢專官以比四方之賓興嘉穀靈獸  
獻禎奏祥皆附以達彬彬乎華要之地而大夫士之高  
選矣天歷己巳皇帝御極之明年飭百官修職禮部奉  
命惟謹乃相告戒不敢怠於事登公堂而更相命曰傳

所謂禮樂合天地之化者豈不謂茲類耶請用合化爲  
禮部公堂之名記堂之始遂亦署官名之員聯屬之次  
於左方云令甲尚書三員侍郎二員員外郎二員主事  
二員令史十九人通事一人國字譯史二人西域譯史  
二人知印二人秦差十二人官並載其姓氏序遷之由  
令史以下因制以具名俾後之人有徵焉

察院題名記

審官之法既壞仕者雜出而天下始不治矣或因緣時

貴以取進或多資以交結變易詭詐佞媚側辟一朝居位而臨民民烏能償其積貪乎世祖皇帝至元五年立御史臺設監察御史振肅庶官糾劾貪邪以繩吏牘以除民瘼當是時宋尚未納土餽饗供給羽書四馳中原數十百州日以飛輓爲事自唐漢之主觀之當以軍府爲急矣而我世祖皇帝憂民方深不俾瘵官毒我黎庶則雖堯舜明四目達四聰者豈過是哉列聖相承成法具在天厯皇帝登極顧御史大夫特穆爾布哈若曰內

外非臺察則官以墨敗者無由而知貪何以懼姦何以發乎汝可於臺院殿院察院刻石以題名焉嗚呼天厯皇帝丕承世祖之謨烈詔臺臣三院題名者臣祖常才雖譴薄不識帝王之度要非夸以示人必勸之以善而懲之以不善也名既刻矣後來者有目爲材御史者有否者則爲御史者可不慎哉臣祖常於是而知天厯皇帝帝王之度也守院御史托克托王德新請曰石既具矣請以爾言爲察院題名記起自至元五年至至順三年

監察御史姓名咸列於左方云

送崔少中序

談者謂近世治賦之臣率多弄刀筆畫籌策日夜屑屑析毫毛利害飛文舞書陽與陰掇一有豪傑魁偉之士學古之人以仁義爲說者則羣笑目譏指號狂惑斥去恐後太師長史燕國崔君以今年春提舉山東鐵冶將行天山馬祖常曰子好仁義說久矣持仁義說往治東賦是舞干羽而戰也是擊鐘磬而田也或曰不然夫操



戈以入人之室雖三尺童子亦將召徒而拒之使之端  
委執綏揖讓下車而問館焉則盜跖有所不敢辭道之  
於天下如是哉遂系以詩曰

衣之華兮雖絢而章道之華兮雖闇而光有美一人兮  
佩鏘鏘捨我而他其何可忘

國語類記序

結繩不施書契有作科斗鳥獸之迹籀篆隸分及今之  
書雜然並傳觀乎黃帝帝嚳而下迨晉楚列國其間貨

錢乃布鼎彝敦簋誌記銘刻文字形畫之殊極六書制  
作之變曾不少相襲體而其聲文音義相生相成百世  
一道我國家造蒙古書因天地自然之數以成一代之  
書求合乎先王之意而不梏於人宜乃列之學士置博  
士弟子員教授不廢是以近世之士鼓篋而游學宮者  
嘗比於孔氏之徒焉太僕經歷持廣平張大卿所著國  
語類記若干卷來請曰是書實古轉注之義爲多切講  
此有年矣大卿乃能綴緝本末成一家言凡國語之引

物連類假借旁通者班班具焉子盍爲我序之祖常曩  
讀曲臺所記及漢急就章諸篇等知世之古今文字論  
列辨博纖悉畢載何則其資寡者其中竊其籍厚者其  
內充則大卿之爲是書後世稽古者尚有考焉

游經歷字序

游氏爲河南望族河南祖常父母邦也宜知游氏爲甚  
悉始辨章公起家以清德素業教諸子皆恭儉守家法  
傳數十年不殄而愈熾以及其孫僣僣年弱冠卽筮仕

爲監修國史叅軍宣政院經歷僎曰子知吾家世吾且有請先是翰林姚公名子曰僎矣而字則未有也願有以字我祖常曰惟古之道冠而字於阼階禮之意以責成人也今子官於朝有年矣庸藉乎字爲也雖然子有命所不敢辭請字曰嘉賓夫僎主人之貳也古之人相見而讌飲也主有僎而賓有介焉僎能修主人之辭以致乎賓賓以授介介亦有以復焉於是乎宣禮節合文章觀辭命整容體油油然大順生人道成矣嗚呼其義

顧不深哉是則曰嘉賓如之何不可尚思有以實之

王夫人貞節序

集賢待制兵部郎中喀爾庫庫之外祖姑王氏故贈上護軍琅瑯郡公之女故御史中丞薊國文正公女弟陝西行省郎中劉天瑞之夫人也夫人十四歲嫁劉天瑞又十六年而夫死又二十六年在所有司上其事於丞相府旌其門焉嗚呼甚矣禮之可以善俗也古者婦人夫死已稱曰未亡人則是欲從而死也今王夫人始爲顯

官女與婦也則夙夜敬事修飭工容及其夫之沒也則  
䟽布被體號泣若將終身嗚呼婦人之行盡如王夫人  
則俗豈有不善者乎然善俗之道視其上之禮如何爾  
上之禮既已敷錫導揚表異褒美書在官府名在州里  
凡所以善俗之道者亦云至矣而縉紳學士讀古詩周  
知先王善俗之意相屬而爲之詩以宣昭天子人倫之  
化且使民有所歌詠而觀感焉是亦縉紳學士之懿德  
也爲義固不偉歟

送聶道元詩序

少之時隨親提攜往來宦游江淮之交纘古績文視世之進取不屑也及官浮光祖常年已二十矣旦夕侍出入吏來白事嘗從廳事後竊聽吏多以名呼私甚薄之獨聶君道元先子每特稱其字焉私又疑之請曰聶君持筐篚曹屬獨字之何先子顧祖常而教之曰兒來前立吾誨汝言聶君異他吏當休沐下直跡他吏皆縱酒叫號市中道元服澣衣而講律義於家不出也斯可敬

矣汝無忘吾言後其名曰大彰灼淮西山南部使者並  
檄聘之貢地官掾轉登臺郎奮迅騰拔出贊淮東憲府  
而祖常承大宗伯之職於朝道元喜且命曰先大夫知  
我我之行子豈無言乎縉紳之士咸已賦詩爲贈矣子  
宜爲序若夫壯詩人之情性惜執手之別離則詩序之  
製也因情性之所由以達乎人之親慨別離之相慕推  
今日以至於當時則茲序之所起也敢以是爲道元送

別詩序



臥雪齋文集序

夫人之有文猶世之有樂也樂之有高下節奏清濁音聲及和平舒緩焦殺促短之不同因以卜其世之休咎象其德之小大人之於文亦然然不能強爲也賦天地中和之氣而又充之以聖賢之學大順至仁浹洽而化然後英華之著見於外者無乖戾邪僻忿懣淫哇之辭此皆理之自然者也非惟人之於文也雖物亦然華之大豔者必不實器之過實者必不良必也稱乎求乎稱

也則舍詩書六藝之文吾不敢它求焉袁君德平之文可謂美矣優柔而不譁典則而不質可以施之宗廟告之朝廷而今已死無及也其子杲游於國學以余嘗從其兄伯長甫官史館而伯長甫又好余甚者也請重序其父之文焉噫德平之文世雖無知者抑何傷乎子杲茲又橐而歸於越山之下一日太史占候言南方有光氣上達於天者其必德平之文在其下也夫

周剛善文集序

六經之文尚矣先秦古文雖淳駁龐雜時戾於聖人然亦渾噩弗雕無後世誕詭骯骯不經之辭司馬遷耕牧河山之陽得中州布帛菽粟之常著而爲史其言雄深唐韓愈挈其精微而振發於不羈嘻文亦豈易言哉柳宗元駕其說恣悵恚怨失於和平淮西雅歌晉問諸篇馳騁出入古今天人之間蔚乎一代之製而學士大夫皆宗師之宋以文名世歐王曾三氏降而下天下將分裂道不得全業文之士咸澆漓浮薄不足以經世而載

道焉皇元隆平宣布文化姚燧元明善裒然在廷以文致位光顯而於今傳之周剛善彙其文數十篇俾余觀之質實而不麻藻麗而不華殫其思以志於文而未已者也茲將官南方故書以爲文序而略告之

送稚勒呼參書之官靜江詩序


奎章閣參書稚勒呼字正卿取高科登朝廷以文學才諳遇知於天子出貳郡治以宣上德而修百姓之務亦可謂榮矣然而有爲不懌者謂正卿宜在館閣華要與諏

訪獻納發謀議佐政事而事效於靜江荒遠僻側隅山  
洑海之地孰失之歟余爲之言曰中州大夫士吏南越  
者往往不樂其土其仕皆有苟且而無憂勤之心以故  
其政事解弛莫致其治教之意而蠻民與猺合盜廣西  
數郡懼其暴天子宰相以靜江重鎮守臣未易稱任又  
知正卿嘗家衡鄂壁於其壤識其山川巖坎之勢市里  
田土風謡習尚話言之變害利詭冒儉良之形制其傾  
搖跳躡而導其善心必有素計也他日正卿以親老乞

高郵便養而天子宰相特有是命焉夫以嘗仕於朝出入禁籞爲文學之臣而治其所居已安所有事之宜否皆已習熟之士專思一慮以勞其職以宣布上德而無苟且以憂勤百姓之務余知其必能成在官之政爲後來可守之法矣此正卿所當自致其治教之意而天子宰相之所以命正卿者也又孰失之歟然余聞往時廣西憲臣帥守嘗併力以勝盜勝則削骸戮孥擣虔毒民使荆湘衡鄂兵以萬數卒殮焉正卿其特將除是而已

邪抑用之爲小異也。豈亦制而導之之素計。猶不免爲是也。天子宰相任之之意。其然耶。孔子曰。天下有道。盜其先變乎。亦嘗思於其言否耶。繇鄂泝湘。過衡麓。抵靜江。吏者多中州大夫士。正卿爲余諗其賢者曰。受命爲吏大者。專方鎮小者。一郡一州。起居靡有所失。食飲不侈。以妄雖越南。與中州不大異也。豈當以不樂而置官以不事利進。褫耶。儻曰。余之言。可豈得蠻徭之爲盜哉。噫。亦其民之幸也。已於是不懌者。與館閣僚友及京師。

聲明之士各欣然爲文章以美其行而勸其無久於外  
以致其去處之情而請余爲之序正卿固喜任事者故  
次第其言以送之



中州名賢文表卷十七



欽定四庫全書

集部

中州名賢文表卷十八

詳校官中書臣瞿照

助教臣常循覆勘

總校官庶吉士臣朱鈴

校對官編修臣盧燧

謄錄監生臣李世麟

城新剏于兵學官攝於老氏之徒迨世祖皇帝教命下  
始正儒師復學官廟事孔子歸孺垣四侵地勒石具文  
作新士子至元二十四年既城今都立國子學位於國  
左又因故廟爲京學京師雜五方俗尹治日不給廟之  
墻屋弊壞將壓以毀講席之堂粗完泰定三年今大尹  
曹侯上視廟貌祠位皆不如制割稍入爲僚窠倡然後  
大家富人合資以聚財者有焉釋子方士分食以庀徒  
者有焉施施于于咸樂相成延兩廡五十有二楹締構

欽定四庫全書

中州名賢文表卷十八

明 劉昌 編

馬文貞公

碑誌

大興府學孔子廟碑

昔我太祖皇帝受命造邦金人孫于汴太祖即以金燕  
開大藩府制臨中夏維時已有定都之志矣故太宗皇  
帝首詔國子通華言廼俾貴臣子弟十八人先入就學

塗飾工良物辨象從祀諸賢百有五人安靈惟肖威儀  
有容又懇請于朝得廩餼弟子員百人受學於師復其  
身不勞以事於是天下首善之教興焉廟肇自唐咸通  
中至遼金燕爲都邑故嘗用天子學制選舉升造與南  
國角立亦一時之盛也而太宗皇帝當雲雷經綸之世  
聖訓諄切以德賞喻父師以櫛楚懲子弟飢焉粟肉渴  
焉酒醴力焉僕使恩義甚備其養賢勸善之誠固已高  
出百王之上矣世祖皇帝立極作則人文昭明登用儒

臣躬親講學故當時勲賢之裔以及宿衛之臣罔不以  
揖讓俎豆之爲懿顓蒙昏庸之爲恥也而三代國學黨  
序遂庠家塾之等秩然羅列於上下才學經術用世之  
士踵武而出暨仁宗皇帝賓興大比四方舉進士凡登  
賢書策名禮部者京師屢倍於外郡非列聖仁涵義揉  
百年之禮樂文物推而致之歟燕自虞夏爲武衛之服  
召公之化尚矣昭王築臺以徠賢士鄒衍樂毅劇辛至  
有稱於世韓嬰以詩易爲一家師孔穎達博綜五經卓

然庶幾醇儒今多士游歌在庭樞衣在廟將見鄒魯之美矣若嬰穎達宜所不道矧衍毅辛之徒哉夫儒者之學詩書六藝之文以至施之天下之道無有二也後世教不明家異人殊各溺於所習以相詆訾由上之教無以一之也嗟夫古者小學大學之師弟子之傳皆本於道德仁義之實著於詩書六藝之文非有教有授則不敢以傳也傳焉而龐雜不經則上有刑也是故風淳而氣同由上之教有以一之也而王國多士逢文明之會

肄業有學學有師春秋祀其先聖先師者又有廟有位  
入有食以處出有貴於衆所以報稱列聖教化之德而  
應賢侯承宣之志者必冠而起矣提舉學事崔居中教  
授賈良弼正張禎錄司視以狀請曰廟之成前尹馬思  
忽實能始之今尹曹偉實能終之經歷王孝祖薛讓警  
巡監院諤都穆爾使李權且能考工於下也余既爲言正  
充郕沂鄒四公配食東鄉位其來請遂爲銘詩不辭詩  
曰

皇元有赫奄受大國于月之崑于日之域京邑翼翼莫  
不來極予誕敷文德新都有嵯辟雍我我璿弁之嵯濟  
爾象犧錡爾弦歌新宮則那舊廟如之何皇帝在御百  
度咸若海輸維枏河浮厥柏是尋是斲虞庠嶽嶽式光  
我上國元聖儀儀元統龍衣衍我先師既右享之采芻  
于池薦此明犧用介我蕃釐蕃釐伊何彼美多士克明  
克類克諒厥事以登膺仕以媚于天子有鏗華鐘路鼓  
逢逢言燕于公有翼有顯多士既同天府是庸維曹侯



之功曹侯閭閭廼承廼宣御劇廼專虞庠連連王士安  
安祇國維賢天子萬年

安豐路孔子廟碑

泰定元年東平岳復經歷安豐路事相路學孔子廟皆  
不稱謀所以大而新之告其長屬一府盡傾意樂成大  
者割財小者秦力咸出名姓以來就功二年總管拜珠  
君上謁廟又先發稍入會錢遣學正及生二人作雅樂  
諸器於吳中於是安豐路學祠事先聖先師廟位禮器

秩有序列矣四年教授官許士淵以狀走京師請曰安  
豐全楚東境州來之郊其土廣衍其物阜大其民質實  
力穡而勤宋失國南播江表嘗恃其人以扼兵衝故百  
年間人俗獷悍當是時雖有聰明俊秀之資生於其鄉  
無師以傳業無友以講學士因亦不得稱於世斯豈吾  
民之罪哉國家覆被蒸庶涵育生遂重熙累洽薰爲泰  
和薄海外內詩書禮樂之教興父兄子弟老老幼幼日  
趨於化矣而安豐爲郡在今綏服之內密邇天子聲名

文物之盛民生衣食仰於田桑無靡習雜好以遷其耳目視聽其志專一而易教而吾經歷君總管君協恭在官勸民以學子備纂注之職可不記以示人乎祖常拜而爲書曰孔子道大天地日月不可象也然古之學者入學必祀其先聖先師後世廟孔子於學春秋天下通祀之所謂推本其始而喻之以義也今二君守官知教民不在笞辱奔走而在於俎豆揖讓不以小法苛急而以大道磨厲先使之入學矣而又使之習禮器且有所

尊敬焉嗚呼有官者皆視其民如二君則天下有不治  
乎飾屋製器用錢中統鈔會之凡七百一十四定一十  
五貫用食工米麥凡二百一十石髹漆黝堊陶瓦材木  
磚石箴泉之具輪山航流無怪各致二君才諳之施於  
民者它可卜矣祖常旁州之民也聞鄰州之士鼓篋而  
游歌于廟于學章甫而逢掖于鄉樂其州有愷悌之政  
而爲鄒魯之俗也詎得已於言乎遂爲詩曰

桐柏嚙嚙淮水中  
潏左峙楚都安豐之  
揭殖我禾麥有

顯者民田田宅宅奠居飽嬉弗大厥知官師維良開冀  
納之嗟我士民天德元善昔逢不辰胄而不升今天子  
聖俊乂咸事嘉生靈應駢入邇至泰和至順庠序聿興  
詩書禮樂喤焉古聲古聲喤喤簫瑟琴有薦豆籩求  
神陽陰我神降嘏多士在學賓興于鄉其光嶽嶽二良  
民庸作民維同鐫辭伐石上于考功

重修通濟渠龍祠碑銘

延祐六年閏八月二十有六日皇帝御便殿詔大司農

臣晏若曰昔我世祖夜夢龍見于掖庭外垣之水中因命祠而神之書其事於碑矣粵在朕躬纂紹繼述今茲龍神之祠弗治將庠已詔少府相宜度工其始列之碑文略事隱汝晏可同禮部尚書養浩重謨碑銘以進朕將俾勒於石焉臣晏等承詔惶恐謝罪退而爲辭曰謹按龍見之水始爲淵泉涵澤滋滌物潤不燥中居京邑爲利最大及至元二十年乃導泄漕引東導沽潞於是名曰通濟渠即其南堦爲龍之祠表位顯岩象設肖似

周宮翼室旁臨夾峙煌煌乎岌岌乎已莫可尚矣而聖  
上孝德純一必欲深體先志示教萬世故葺剝補弊塗  
堅再新埏埴黜堊髹漆鍤錮之制不侈而文祠旁又爲  
觀音大士堂二楹齊庖房宇曲對列居環以天潢浮光  
上下龜魚泳游日星景采誠可安神棲而宅龍靈也某  
年月上以大比丘尼某主領衆比丘尼率奉祠事歲時  
祝香有使嘉應旋臻今年夏天不雨有司告狀上屬巡  
幸北都遣官來祠行事之夕澍雨大注逮車駕還御光

天宮明日又雨臣衛胥悅幾旬大穰自茲上益神之臣  
晏等伏惟世祖聖德神功文武皇帝繼天撫運乾奮飛  
御感召陽類夢孚神龍所謂變化不測雷雨下方者也  
迨皇上登極文治聿興至誠格天深仁被物嘉禾駢植  
乎壠畝瑞芝聯莖乎廟學百神述職三辰順軌諸福彙  
集有禱斯應况龍者天神之精靈明所鍾固能陰助施  
他贊相元氣於冥漠之中者也嗚呼歷觀隆古哲王清  
心無爲然後可以對上帝洽人神而納一世於大和至



壽之域也今我聖天子宵旰圖治光大祖訓所以寵綏  
煦濡鰥寡惇獨者靡不悉所以祈天永命斂福錫民者  
亦靡不虔斯其祠龍之神而資我生齒年穀之事也歟  
猗歟盛哉臣晏等謹百拜稽顙而獻銘曰

於穆聖祖天聲震發陽德正中監觀景鑠有龍孔靈協  
夢之徵下見池籞侑帝歲登帝曰祠之罔神之媚訊占  
習古考祥天類亦既在庭厥德嗣興牆屋雅雅靈棲是  
承惟延祐天子凡生資始敷文周雍祈年漢時皇武繹

思茲宮重新工徒獻功丹漆矢陳櫟題完好不斲以斲  
神具底寧相我鉶鑄惠布甘澍勿需縈雲神噓爲雲出  
入罔以輿帝侔來臨鄉藉式忱祝辭不誣神其時歆神  
其時歆皇永有報億萬之年用祠昭孝

勅賜宏濟大行禪師創造福州南臺石橋碑  
銘

至治三年今天子嗣大厯服慈仁儉勤思與元元共迪  
天休惟淳圖意義廣大廼嘗詔祠官咸秩厥祀凡其徒

功行峻潔者特褒寵之踰年改元泰定宣政使臣伊埒  
特穆爾以福建平海頭陀禪錄白業修著宜錫恩渥謹  
上言曰師王姓法助名也世爲泉州農家母感異夢而  
生生十二月而爲沙門又一年而受沙彌戒又七十五  
年而歿歿三年而葬葬又九年儻無以表異之非天子  
廣慶推恩褒寵功行之旨也師天性圓悟善心自然始  
執業於靈應師再叅諸毗尼師不泥不拘無有障礙惟  
以發明已事爲究竟故研窮內典洞了佛乘日發猛勇

以畢至願嘗見舟濟西江者即惻然曰是必及於難報  
止之弗聽卒之暴颶飄溺又嘗爲隸於海濱水嚙蝕隸  
且崩師麾以翼潮爲縮云身衣百結木食澗飲更歲時  
寒燠不懈蓋道益勤而心無怠年益邁而志彌篤此其  
行甚高福唐粵閩之會城三面距江其水皆有高下石  
錯出其間若騎布獸伏迅湍回洑旁折千里匯而爲南  
臺江日以舟櫓比連大絙爲浮梁以濟每潦漲卒至則  
絙絕舟裂於兩碕民多溺焉師故將橋江以利涉者先

命弟子吳道可走京師因圓通元悟大禪師李公聞於  
上天子嘉其意詔師卒成之既被命矣衆愈弗疑於是  
大姓割其財小夫奏其力閩監轉運使王某且率其屬  
合治之不一年得錢爲貫者數百萬廼爲墩二十八植  
材木礮密石納水腹而基之工未告具而師化矣後二  
年其徒曰嗣玉法喜法秀德遇嗣永實終成之長一百  
七十丈有奇仍積其贏資及故端明殿學士王君某田  
之歲入岸南北爲亭北岸之東爲寺御史中丞曹公扁

曰萬壽橋寺如橋之扁師所至人爭趨之故居泉則有毗藍菴彌勒菴居興化則有嵩山院寶塔院居南安則有星聚堂昆崙堂凡爲菴爲堂爲院爲亭爲塔爲陂爲埭爲杠爲大橋爲三門佛殿總一百八十有六狀皆瑰詭殊絕而南臺萬壽橋其尤鉅者也此其功甚大先是師未歿之二年仁宗皇帝賜璽書加號宏濟大行禪師帝師亦授衣一襲爲傳法本其所以寵賚光大之者匪自今矣嗚呼一眞如界復何假於人天小果也夫然相

以表性非象不彰故彌勒之華嚴阿育之寶塔遍於十方豈真爲偉卓觀美而已今之學佛者昧於此或離乎真或蔽乎物俚俚焉幾無以存其身而大戾厥教視師爲可媿矣是其功行皆可褒崇奏聞有制曰可其命史臣爲文以刻諸石銘曰

菩提大士諦真如假象現法表道樞宏濟禪師廼其徒心如摩尼形槁枯洞開五蘊觀空虛究竟三乘超有無食糲衣卉損豐腴精勤妙用行不渝閩人歡喜歌以趨

鉢錫隨地成屋廬作杠截流載大塗車跡步武乾無濡  
萬猊蹲蹲護浮圖長杙下入龍蛟區磅礴山骨積重跗  
中鑿水空通尾閭居者行者若賜酺坎其擊鼓吹笙竽  
師歸冥冥衆爲吁百神導引幡幢紆海國田良陂有魚  
稚齒生長耄耄娛史臣爲銘承帝俞世世無圯視其郭  
翰林學士元文敏公神道碑

有元古文之崇曰翰林學士清河元公以至治二年壬  
戌二月七日薨於位葬而墓碑未刻其長子奉議大夫



同知峽州路事晦又死次子嵩七歲一女病而不嫁一  
孫尚乳也夫人清河郡夫人李氏纍然抱其孫僦船歸  
清河織紵以居賓客僚穎皆四散無一人顧之者獨其  
友玄教大宗師吳全節謂馬祖常曰清河公以文起家  
可謂貴顯光榮矣而其葬之後無碑以載其官閥世次  
行事之實爾宜爲文我求善楷書者礱石以刻焉祖常  
曰嗟乎世之士一得志則攘袂於所親一不得志褫魄  
若不能生者比比也今子託跡老氏而以禮義之事振

吾徒何能多言以飾媿哉謹按公諱明善字復初資穎  
悟絕出讀書目所過即記諸經皆有師法尤深於春秋  
弱冠遊吳中憤宋金季世之習已名能古文流傳江淮  
間浙東部使者薦之行省辟正安豐路學再正建寧路  
學居歲餘行樞密院辟充令史故辨章董公士選實僉  
院事敬之如賓不以曹屬御之也董公遷江西行省左  
丞復羅致之省中曾贛賊劉貴反從左丞將兵討之擒  
賊三百人議緩誅誤得全活者百三十人又將斬一賊

命公臨斬左丞曰掾儒生能臨斬乎當震怖矣終刑已色不變將佐白宜多戮人及尸一切死者用張軍聲公固爭以爲王者之師恭行天罰若等小賊跳梁殺其渠魁耳餘何辜焉賊貴盜書民丁十萬於籍有司喜欲發之公夜置火籍藁中焚之以滅跡賴吉遂安南行臺聞之亦辟爲掾未幾進登仕佐郎樞密院照磨轉中書省左曹掾曹無留事坐誣免不辨僑寓淮南文學益肆頃之坐誣事明復掾省曹至大戊申我仁宗皇帝養德東

朝左右文化選天下髦俊之士列在宮臣公首被簡拔授丞直郎太子文學仁宗即皇帝位遷翰林待制承直郎兼國史院編修官與修成廟實錄明年與修順廟實錄加奉議大夫是年陞翰林直學士朝列大夫知制誥同修國史有詔命節書文譯其關政要者以進公請與宋忠臣子集賢直學士文陞同譯潤書成每奏讀一篇上必善之曰二帝三王之道非卿莫聞也太皇太后既受尊號朝堂集議宜赦公曰數赦非善人福宥過可也

乘傳出賑山東河南飢彭城下邳諸州連數十驛保馬  
民飢官無文書公專以鈔萬二千定分給之民免死徙  
皇慶壬子修武宗皇帝實錄明年遷翰林侍講學士中  
奉大夫預議科舉服色延祐乙卯國家始策試士子選  
充考官廷對又充讀卷官迅筆詳定試卷數語辭義咸  
委曲精盡他人抒思者不及也改禮部尚書正孔氏宗  
法以五十四世孫思晦襲封衍聖公事上制可之叅議  
中書省事毗贊良多知戊午貢舉復入翰林爲侍讀學

士通奉大夫歲中拜湖廣行省叅知政事便道過家上  
冢鄉之父老子弟迎謁勞問禮意周洽庚申英宗踐祚  
徵入爲集賢侍讀學士召至上都議廣廟制授翰林學  
士資善大夫修仁廟實錄百官迎仁廟聖容云有卿雲  
見承詔爲文以紀之賜酒加賞英宗親裸太室禮官進  
祝冊奏請署御名上命代署者三眷遇褒優近世無有  
也旣薨之三月歸葬於清河王家原之先塋西三里泰  
定間得請於朝贈資善大夫河南江北等處行中書省

左丞追封清河郡公諡文敏曾祖諱興不仕曾祖妣楊氏二世以下皆以公貴祖諱海贈嘉議大夫秘書卿上輕車都尉追封清河郡侯諡貞惠祖妣高氏追封清河郡夫人考諱貢將仕佐郎同管勾蘆瀝鹽場贈中奉大夫吏部尚書護運追封清河郡公諡孝靖妣弭氏追封清河郡夫人元氏蓋拓跋魏之苗裔南北轉徙不知所系家清河者至公四世矣享年五十有四其文有賦五詩凡一百六十三銘贊傳記五十九序三十雜著十五

碑誌一百三十出入秦漢之間本之於六經以涵泳其  
膏澤叅之於諸子百家以騁其辨刻而不見其迹新而  
必自己出蔚乎其華敷鑄乎其古聲倡古學於當世爲  
一代之文宗者柳城姚燧暨公而已信乎其必傳也雖  
然才用而未盡積厚而施寡徵之於天其善後也無疑  
祖常曩從公遊及公考士又辱第下列義當銘銘曰

於維公文並古立大沛厥辭世莫躋震龍瞽瞍力不克  
蜚聲天衢名嶷嶷位臻公卿發軔跡蘊而不施用弗極



神柩其馳學廼碩天藻挾縵琢圭璧五十四年返元宅

集賢直學士貢文靖公神道碑銘

天曆二年十月朔旦集賢直學士貢公歿於家越五年  
爲元統甲戌其子師謙來官京師以公之行治泣請於  
朝天子贈公翰林直學士太中大夫輕車都尉追封廣  
陵郡侯謚曰文靖集賢臣顯又奉詔令臣考公族世里  
居官次蹟業之實賜師謙以刻於石以寵賚貢氏之家  
以勸朝著師謙知臣於其父宿有好也廼錄翰林修撰

臣李黼編輯之狀授臣曰先臣之生其有所自立其流聲美於人其可以傳世而善後者孤不敢贊已維墓有碑實後嗣所以記先人之德而飭其千百世子孫於無窮者今幸得以承聖天子明詔以請焉其足以稱碑辭而無慙者公幸張之臣敘曰公姓貢氏諱奎字仲章其先大名蒲城縣人七世祖祖文以武德大夫扈宋渡江繇鍾陵徙居宣城之南湖因家焉曾王父大用王父應寔宋承節郎以公貴贈中順大夫禮部侍郎上騎都尉

追封廣陵郡伯妣黃氏廣陵郡君父士濬累贈亞中大  
夫秘書太監輕車都尉追封廣陵郡侯甫冠以詞賦試  
漕司中程明年黜於儀曹即自訟曰學之時其道未足  
以爲己志已在於爲人亦可謂謬用其心矣謬用其心  
雖有志於爲人其能乎哉乃力自學行歌詠息偃以忘  
其年視世俗之好無足累心者獨愛公甚於他子曰三  
郎和易端厚穎悟若過人者吾世有蘊德發必在是兒  
也公年十歲輒能屬文已有聞於人及壯讀書并日夜

忘寢食於經子史傳無所不治於其章義辭句類數名  
制委曲纖妙無不究詣於文章辨議閱放僞傀不狃卑  
近必以古爲臆故出而名振江南初被漕省檄爲池州  
齊山書院山長終更謁選吏部時天下久平大臣常欲  
引海內儒學之士聚之館閣所以長養其才而待上之  
用公亦欲以功名自顯果於自立故不爲非常苟異之  
節而清約才博之譽大夫士翕稱之大德六年中書奏  
授公太常奉禮郎兼檢討上書言先王之制禮雖節文

有經而本誠貴質惟不蔽於禮之文而得禮之意則可  
以對越而無慊不然煩爲之節無益也朝廷多采其議  
九年遷翰林國史院編修官至大元年轉應奉翰林文  
字階將仕郎預修成廟實錄丁秘書府君艱比京師至  
家毀瘠枵然言不能聲太夫人見之曰爾嗣業於祖從  
事於朝少而學壯而仕父母曰是將大吾家鄰曲曰是  
能華吾鄉宗人朋友之望爾猶是也爾父不幸死喪不  
有中制耶脫有諱非孝也始勉之粥食以自強嗇延祐

元年服闋起除承事郎江西等處儒學提舉明年就官  
見列械署庭胥旁午走繫數人立吏持牘詣公署曰是  
學校吏報事愆期者公斥之曰金穀勾稽犴狴木索賤  
有司事爾以天子命提舉儒學教吾職也刑奚以爲悉  
命釋繫以械屬縣官大書其坐之屏曰讀書之中日有  
其益飲水之外他無所求與諸生講說文義爲師弟子  
揖讓周旋日匡坐堂上人見其色和其容謹其言繹繹  
有理輒退而燕處聞其哦咏之音若程工督計者故士

之屨恒滿戶外其及門者亦進不怠以止五年遷翰林  
待制預修成廟實錄書成特賜金幣有差至治元年謁  
告歸里第與兄仲堅甫奉太夫人以居斂氣下聲昆弟  
相顧白首怡然鄉人皆樂與從之游至於羈旅客其  
歸之者無不厭其意公於接之雖勤未嘗見懈色於資  
之衣食給物雖頻未嘗有所吝惜太夫人病竟夕立床  
第前聞太夫人咳息之出輒倚氣喘戚若以身代然者  
泰定元年太夫人卒三年復起公爲翰林待制進承直

郎秋七月拜集賢直學士奉訓大夫秩從三品天厯元年文宗即位冬十月上親祝香幣命公往祠北岳淮濟南鎮二年春還自會稽涉吳中以疾歸臥於家至十月朔謂其姪師文曰吾夢夜賦詩有云竹樹蕭蕭夾泉石又云九轉丹成生羽翼不祥耐何語竟溘然以歿公有智識度量人不見其涯涘凡與鄉試~~未~~衡一爲廷對讀卷官所取士多知名於時其所第甲乙人咸服其平允其爲天子代祠之使者再其攝大禮使侍天子裸太室



者一皆肅恭靈神虔致上意爲使而不疚於貨賄不煩於有司攝官而竣事無違禮是皆公行之微而世亦不能及也然公負有爲之志不得盡見於事於勢利之間又不求機以投合取顯以其故終於館閣文字之職而人之被其澤者蓋尠嗚呼此人之所以爲公惜公之所以爲公者如此而臣以此悼公者也公一時之與交者若清河元明善東平王士熙四明袁桷巴西鄧文原長沙文矩悉當世豪傑聲名之士若臣者亦公之所厚故

於公之碑得以盡臣之言焉而非私也公以歿之明年正月八日庚申葬宣城縣射亭鄉生田里之原享年六十有一母夫人李氏追封廣陵郡夫人配張氏封寧國郡夫人追贈廣陵郡太夫人子男二人師謙從仕郎集賢院照磨師泰由胄子試中程授從仕郎太和州判官辟署江淞省掾曹女一人適阮庠孫男三人高安奴吳山奴萊山奴孫女六人其所著曰雲林小槀曰聽雪齋曰青山謾吟曰倦游集曰豫章槀曰上元新錄曰南州

紀行凡百有廿卷晚年粹擷諸禮書爲一家言未就而卒今師謙師泰皆孝弟純篤緝學以世其家加之以磨礱灌養之功而不止其所至方未艾也論次終始作爲銘章豈特以榮貢氏以慰其孫子以勸以侈以貽其鄉里哉將以昭聖天子褒優儒臣之意以垂盛世之鴻懿也謹再拜稽首爲銘以獻曰

貢氏來北肇自武德蓋其忠威光被南國有善自身乃開承節繼屬綿綿其承有奕秘書有子以文起仕奮蹟

大常旋書帝制有疑其容志眊萬里大騁瑰辭綜經緯  
史始來玉堂騰聲其駕惟長在右惟同在亞在側惟僚  
相頌歎訝公夷坦坦弗矜愈下銓覈再試士曰予歸讀  
卷廷中帝曰予依淮濟吳越四周所覆公馬駢駢持幣  
奔走神歆公虔蕃祉以茂式久在序侍從之班告疾歸  
止幾佚於閑竹水以居南湖之山公出公休鄉人嚶嚶  
廩餘者粟與黨及鄰屋藏有書遺其後人素領丹頤隕  
焉以怡言笑在耳乃哭於帷維公德善歿不見其窮維

公所著傳不見其終有嘉二子且用未極其崇維儉於厥躬永也其鴻刻銘墓宮豎江之東有萬子孫紹美於公

大元贈中奉大夫行中書省參知政事張公  
神道碑

公諱昂霄字雲卿姓張氏其先世居定州五代時晉高祖割燕薊諸州賂契丹又徙鎮定民以實平營故今爲平州人金末擾亂世牒無所稽祖伯韜有文學不仕讀

書授徒爲鄉人俎豆師生鑑鑑爲海山縣丞有惠政娶  
聞士程虞卿女有子三人長即公次冲霄仕平州酒稅  
醋使以卒次平霄副鎮江丹陽酒稅醋務歿贈官從仕  
郎保定路易州判官公力孝弟尚學術敦慎以睦宗族  
子姓稱賴無有間言國初檄文臣詣都邑試士人學中  
程者復其家公首以詞賦備選至元七年辟署平灤路  
轉運司知事十年階前資提舉北京平準行用庫克勤  
厲守咸較然有聲終更序績遷管勾濟民鹽場顧子弟

曰曲直有施而莫盡材余豈能僂俛中哲匠繩度者而  
或予強也惠幼禮長葺力食生知天德自貴於物而行  
苟不忤人道殆其盡於茲已奚必仕而爲榮爲得祿哉  
於是居閒益講詩書六藝之學置諸生左右撫掇前聞  
分釐辨對俾達所趣內熙外易慥慥肫肫對客燕坐語  
及古今人物賢否事後成敗利鈍若水斷縷緝悉有左  
契每臨筆爲文詞必緣情稽類不峭澀艱遠而夷然有  
古作者風意歲時從容課童僕治生業往來里閭十有

餘載無忿氣無慢容殆依乎厚君子也以至元廿五年秋七月二十有四日考終於家享年七十其年十月某日葬平州西苑家莊之原子男九人長諱杲卒海山縣酒稅醋使次諱某早世次諱昱同監昌黎縣酒稅卒次名昇今奎章閣大學士資善大夫爲時名臣次名昆承務郎陝西等處儒學提舉次諱曇少知好禮讀書日記數千百言弱冠爲兵曹掾聞其師滕司業卒中山謀請臨哭其喪例不許因棄掾得就哭還金教務自多學



記覽以博其用而不幸亦卒次名最承直郎真定路藁  
城縣尹次諱晟既冠而世次曰旦承事郎遼陽行省照  
磨官女一人適士人劉源男孫凡十有三人曰璵監安  
豐路霍丘縣酒稅曰琳學而未仕曰山童夭曰璵將仕  
郎章佩監知事曰琦從仕郎隆鎮衛千戶所知事曰琪  
甫冠卒曰仁童曰居安曰鮮州皆夭曰瓚國子生曰琥  
未冠卒曰珪曰琢幼而學曾孫男三人曰紹安慙兒范  
陽玄孫男三人曰元孫聞孫定孫皆幼孫女五人長適

同監馬城縣務趙簡先卒次又適簡次適遷安趙壁次  
適大寧楊誠次名賽未笄卒曾孫女二人曰高曰順玄  
孫女一人幼未名泰定二年以公子昇時官階二品例  
推恩二代鑑皇贈嘉議大夫禮部尚書上輕車都尉追  
封北平郡公妻程氏追封北平郡夫人公皇贈中奉大  
夫河南江北行中書省參知政事護軍追封北平郡公  
初娶白氏卒繼室故元帥龍德讓女宜家訓子成其內  
助而先公十九年卒追封北平郡夫人再娶夫人妹後

公廿年卒國制諸夫人當封者格止一人昇以妻封讓  
後夫人龍氏得請亦追封北平郡夫人咸祔葬公塋禮  
也至順四年春集賢侍講學士昇以狀屬其門生馬祖  
常雖不獲拜公而辱公子昇知最久跡其尹汝南焚禁  
書以全逮繫治越州忤權臣以逭民賦及敗厯臺省則  
又有猷有爲而公之流聲遺澤可考而知矣嗚呼燕營  
間山川磅礴鬱積之交鍾而爲人者發舒凝蓄固有晦  
有明而豪俊瑰瑋之器世恒見之豈不以其稟之厚歟

公生當草昧之初能知讀書業儒而躬不食其報殆所謂稟之厚而未顯者也不然胡寧公卒甫五十年而張氏之門躋膺仕紆章紱者充然滿廷耶是豈特因公之緒以知公又將驗夫燕營間靈明之所鍾也廼爲之銘曰

有燕營陬有鬱平州藹其焄焄孰涵以收張氏德門實會其休王父伯韜肇茲善慶間闕以生乃起厥間積厚而微勃焉其奮寔生縣丞揮于惠政世濟其美伊自公

始既穀既官而屹其止曰熙曰勤以淑有子維德之徵  
爰受多祉後五十年奕其有侈于公于侯籩豆承祀紱  
冕車服舄奕委委昇也履之公實啓之有封馬鬣神安  
居之本哉云云迪爾後昆矢詩貞石式昭覃恩

敕賜贈參知政事胡魏公神道碑

皇帝御咸寧殿御史大夫臣某侍御史臣普化奏言侍  
御史臣龔服勞官常夙夜殫忠力以稱所使蒙陛下器  
選爲臺臣秩第二品得贈其父官中奉大夫職江淞等

處行中書省叅知政事勲護軍爵魏郡公蓋所以慰寵  
胡氏以昭其先人之善者既鴻奕已臣藝將敘緝其家  
之望郡系世及其父祖妣之休聞實澤刻書於碑圖久  
不泯以侈陛下之賜以賁其鄉里以勸其後孫子於亡  
極藝惶懼未敢以聞惟陛下哀憐之制曰可乃敕臣祖  
常爲製其辭臣昧死敘列以進曰胡氏遠出於舜周武  
王時有封於陳爲舜後者曰胡公至春秋之世楚滅陳  
子孫轉徙因氏胡爲肇姓其後仕於漢曰建曰廣者以

勲名著歷魏迄唐代有聞人金之末鄆陵之胡氏徙相  
州之安陽縣公諱景先字彥明相州安陽人也少端默  
有遠操內自修飭不求當世之譽樂其所守謂竊術求  
榮不多於竭力以供子職枉已逐物不賢於隱居以遂  
吾志故事親爲學力田業生以終其世於貴富寵炎未  
嘗動於意兄歿事寡嫂岳尤盡禮畜其孤某如已子里  
人有貸錢爲本業子本相埒至萬十數貧莫能償主責  
之棘聲自經公捐資與償之里人謝爲券質公所公火

其券歲大侵出廩實以賙其鄉既匱又賣田繼之至熟  
人將酬之不受鄰有喪子弱貧無所有公爲具飯含及  
衣被棺木以歛藏之恤其孥既長俾有家願傭以報不  
許盜有竊其牛羊者又竊所乘馬公知賊處一不問人  
嘗具饌奉公公肉而甘召庖人問之曰燔能澤濡能焦  
味奚是適庖對以法上下釜皆新鑄合肉其中密其款  
頂跡加火焉公曰毋得釜損乎味於適而器於弊吾弗  
忍其平居恂恂恭謹遇人無戚疏豁然無機矇或欺罔



之不以變春秋高矣出入閭里嘗却車馬不御與故人  
父老游或具几杖亦不扶以故鄉人皆德其善而嚮其  
莊不忍以字稱之尊之謂翁其長者謂其子弟必教以  
公爲法曰爲人若胡翁足矣其歿也惻寡飢饉難亟患  
阨之人相值必曰胡翁之亡俾吾無所控恃致和元年  
二月六日方與親戚高會言笑如平時忽舉手謝容匡  
坐而歿得壽八十以其年五月十日葬安陽縣孝明村  
之原初封奉訓大夫載封朝請大夫同簽太常禮儀院

事騎都尉安定郡伯進封翰林直學士亞中大夫輕車  
都尉安定郡侯累贈魏郡公夫人王氏亦鄆陵望族慈  
孝貞靜處親族遠近長幼間盡其宜嚴饋祀親紉縫澣  
濯至老而無懈容事夫能成其志教子能成其材彞官  
於朝間里以爲夫人榮而卒不見其喜彞官題以貧匱  
不足於養爲憂輒喜曰此吾所以教子也彞居魏公艱  
服除起拜陝西行臺治書侍御史辭就養夫人止之曰  
西臺臨四省四憲朝廷倚爲重地且秦中歲饑是辭豈

義之急病讓夷者而忘而父之訓耶後公三年六月六日卒祔公墓累贈魏郡夫人臣嘗銘其壙予二人曰彛由丞相掾起家爲工部主事官十轉爲中奉大夫職十有二遷爲侍御史曰規兵部曹女三人適鄭某王某李某皆士族孫二人敬伯侍儀舍人柏壽尚幼孫女二人適大司農侯公孫某樊某臣嘗聞彛爲河南行省左右司員外郎時河南大饑使告發廩者如繹省臣以格未即許彛時代判省牘廼專發米三十二萬石所活五十

餘萬人其爲河西隴右僉憲隴右地極邊吏往往闊略  
乾沒無所顧彛按摘繩姦賊墨坐者十有一人釋濫繫  
者八人沒贓四百五十萬緡其爲右司都事有以西域  
僧卜兆言釋重囚以解除者中貴人傳旨引富人子當  
死者至內廷將脫械彛白宰相置之獄其爲御史爲員  
外郎左司所言於上悉同案所不能且不敢言者臨事  
裁決引大體略細故矯矯無所屈又聞其爲尚書戶部  
也天子入正大統故與親王宗臣庶官衛士錫予之數

爲金幣穀帛以萬萬計時浹月間舉故典者再執事者  
請括金民間以充用時廷臣多是其議彝獨以爲不便  
乃稽諸內府之隱覈郡縣上供之實與內帑歲積之羨  
不給則令鹽商入銀以準幣大朝會遂無闕事臣攝官  
御史中丞知經筵事實與彝同署又見其闡翼憲紀糾  
繩官衮入侍講幄考質經義究觀前世之變而至夫理  
亂興壞之際必委悉焉此彝之事臣得之於耳目者士  
論咸以誦彝而彝之語臣必曰魏公之教不敢忘嘻觀

彛之事而質以其言蓋可以知公矣考諱用璋疎達明  
信不肯爲自欺以德行化其鄉曲鄰有棗樹歲秋實積  
墜舍旁地命左右拾以歸其主與人交不矯矯以異亦  
不翕翕以同以故人莫能親疎之居嘗自號曰陶然翁  
嘗語公謂胡氏之先世大業有蘊德未發當後有食其  
報者至彛果顯用爲賢臣亡妣祝氏修身理家有懿則  
其智識德量過人遠甚畜馬有夜盲者僮擅面謾市人  
取直以媚夫人遽叱還其直且謝曰僮不以質言而輒

汝給吾不忍也以曩貴皇贈嘉議大夫吏部尚書上輕  
車都尉魏郡侯祝氏魏郡夫人嘻觀公考妣之事而徵  
以公之善尤足以知公世德之遠哉初吏部與其兄弟  
起鄢陵提家北絕河來相兄弟皆還鄢陵而吏部獨考  
室于相焉其先嘗繼爲宋金顯官而天興剽難之餘雖  
鄢陵葬有塋塋有碑石剝泐文不可識故其世莫得而  
詳然胡氏陳胡公之後於陳氏國分姓也昔漢陳太丘  
之仁鬱抑於當世而紀謚羣泰貴顯者數世豈魏公之

先既有榮名而子孫逢時不祥又有翳善晦德如太丘者乎不者何後世之碩大蕃興若是臣又知彞之孫子貴顯尚未艾也臣奉詔以國子博士臣沂原大敷懿之狀考公子之所履以求公之世而得公之言行如此於是謹爲之銘曰

周有胡公賓王纘聖陳墟姓別昉氏安定曰建曰廣漢樹顯聞亦有威奮蜚聲魏晉彌宋涉唐代奕其盛子孫世食占徙靡常既又抑阨載遷安陽維安陽里其承有



煒吏部之孫魏公之子謹論侃侃稱天子使天子曰嗟  
彝侍御史工協於極邦肅於紀咨子爾嘉懋正厥事彝  
拜稽首臣昔筮仕左右致養以官就侍天子之仁既多  
受祉臣罪不穀失我怙恃帝閔臣孤賚之慶貽有爵有  
官秩躋第二生則孔榮歿顯亦熾維昔魏公殖善弗匱  
備樂孝養亦又多譽發祥在彝實興佐時維皇好德是  
緝公熙肆厚厥有乃永其貽繩繩胤似勿替承之鄢陵  
之野既封既樹相城北西亦有新墓帝錫之碑昌此文

壽百世其延庸勛爾曹

濟南安氏先塋碑

濟南安氏有諱圭字伯玉者明法律起家始試補行省  
刑部令史尋遷樂安鹽司判官濟南府經歷官未幾又  
補行尚書省令史權行省刑部員外郎仍正授員外郎  
進至濟南行省左司郎中是時君年甫踰六十矣即謝  
事家居不起以至元甲子五月初七日終於正寢享年  
七十有一其子某以是月十三日葬君於某鄉某原先

瑩之東夫人成氏祔焉君先娶成氏再娶張氏成氏宣武將軍章丘簿昌之女先於君二十年卒有子四人長曰伸次曰僖曰倪曰侃女一人適濟南張鐸伸爲登寧場鹽司管勾配成氏有子五人長曰惟湛次曰惟潛曰惟澄曰惟溥曰惟泌僖監泰安州酒醋稅配段氏有子二人長曰惟洪中議大夫江西湖東道廉訪副使次曰惟洋倪爲濟南府孔目官早卒無子侃朝列大夫知安東州配李氏有子三人長曰惟潢從仕郎冠州判官次

曰惟淑監濟州稅曰惟漢早卒曾孫一十人長曰景范  
惟湛子也承務郎彰德廣平臨水等處鐵冶副提舉曰  
景元惟演子也進義副尉監杭州富陽縣稅曰景時早  
卒曰景良曰景嘉惟溥子也後衛典吏曰景益惟洋子  
也曰景璘惟洪子也曰景肅景周景魯景開景略皆有  
學未官按安氏上世家棣郡後遷濟水南郎中君獨能  
以吏文崛起致身高顯而其子孫廸蹈世美或仕或學  
悉有名稱豈非郎中君生平有淑德懿行嗇用世資不

赫赫發於其躬而彌致其來者踵踵也是宜植石鐫辭  
以昭示無極銘曰

惟鼎鍾以受也惟穀帛以售也德克肖之永有紹也

故禮部尚書馬公神道碑銘

公諱烏呼訥世本屬雍古部族居靖州之天山天山古  
居延海也曾祖諱特穆爾伊克祖諱博索瑪伊埒蘓海  
以財雄邊父諱實喇濟蘓當金遷汴都尚書省辟爲譯  
字掾曹試開封判官改鳳翔兵馬判官死節贈鎮國上

將軍柏州刺史官名優瑪因以立氏父死節時公年甫  
十七壯其父之忠義奮而投冠於地誓曰吾父死於國  
難吾紓家難可也遂侍太夫人王氏間關鋒鏑跋涉星  
夜出汴絕河而北見憲宗皇帝於和寧年少辭容端敬  
憲宗嘉賞之命贊布扎爾斷事官事國朝天造之始總  
裁庶政悉由斷事官燕故城爲斷事官治所中原久刻  
兵燹民謳吟思見太平之日公力籌畫規度政修事舉  
士悅民附胥爲太和世祖皇帝以親王南伐公從行畱

汴餽饗六師悉發輶

音

人賦一石取濟南鹽自堰頭舟

行陸輓數百萬斤散布軍所過州郡汴蔡河南之地農

在野而商在塗不恐不驚而軍政修焉世祖皇帝即位

降詔褒獎其詞有曰有此勤瘁深可尚嘉云者阿拉克德

勒據魚兒泊叛倉卒之際公罄家貲市馬五百疋進上

世祖皇帝嘗給券賜其家曰後當償汝也版戶遂試學

子通一經即不同編民今令甲儒免丁者公始之也中

統建元既肇建省部明年拜禮部尚書佩金虎符四年

八月二十一日薨於上都之邸第訃聞内外文武之屬  
縉紳之士咸嗟悼盡傷形諸文字之間迄今傳而不泯  
也嗚呼公之薨年甫四十有八即以某年某月日葬於  
大都宛平縣清水河之陰之原太夫人王氏墓後梁郡  
夫人白氏祔後六十四年爲至順元年曾孫祖常辱官  
禮部尚書請於朝追號推忠宣力翊運功臣勲上輕車  
都尉階正議大夫爵梁郡侯官僉樞密院事謚忠懿子  
十有一人長諱世忠常平倉都轉運使次諱世昌行尚




書省左右司郎中孫祖常官忝第二品推恩二代贈嘉議大夫吏部尚書上輕車都尉梁郡侯次諱世顯知通州事次世榮早卒無子次世靖不仕次世祿中山府織染提舉次世吉承公廕絳州判官次審溫嘉議大夫歷台州淮安瑞州路總管餘三人蚤卒不仕女四人三蚤卒一嫁廣東道副都元帥庫哩濟蘓孫二十人長諱潤朝列大夫同知漳州路以子祖常備侍御史贈中奉大夫河南江北等處行中書省叅知政事護軍梁郡公次

節入王屋山爲道士次禮下硤鹽司丞次淵不仕次開  
監在京倉次遺道遵皆卒次通迪次保六賜提舉都城  
所次未名卒次岳難武略將軍蘭溪州達嚕噶齊次雅  
古處士以孝聞次必齊納奉訓大夫同知興國路事次  
祝饒監富池茶場餘四人未仕曾孫三十一人長祖常  
由進士轉官侍御史次祖義郊祀法物庫使次祖烈汴  
梁等路管民總管府案牘官次天合監杭州鹽倉次祖  
孝管勾河採鹽場次易朔南察院書吏次祖謙昭功萬

戶部總使府知事次祖元信州路教授次羅和知行唐縣仕者九人餘者學而未官也玄孫若干人長武子中書省掾次文子國子生次獻子惠子並國子生餘皆幼諸女孫以多載於家傳茲不重出嗚呼我曾祖尚書德足以利人而位不稱德才足以經邦而壽不享年世非出於中國而學問文獻過於鄒魯之士時方過於草昧而贊襄制度則幾於承平俾其子孫百年之間革其舊俗而衣冠之傳實肇於我曾祖也嗚呼祖常生三十三

歲父潤南官漳州教祖常曰吾祖有德未盡發吾官州  
郡不得施今汝頗樹立其大將在汝也後祖常佩父訓  
不忘忝官翰林直學士太子右贊善大夫禮部尚書叅  
議中書省事入臺進侍御史叨冒寵榮夙夜憂懼惟恐  
違父之教而墜我曾祖之業蒙不孝之罪死不瞑目於  
地下葬儀不具塋域不廣欲改卜而遷之宗人曰封樹  
八十年矣神殆安茲未易改卜嗚呼祖常既撫我曾祖  
行實萬一而略論次之矣恐不泣而終銘之銘曰

有崛而起之孰趨而掎之將濟世美必承而履之懿矣  
我祖百年於茲衣冠之傳實維啓之世多王公亦多華  
靡惟不革俗而忽其圯繩繩孫子思馬有氏咸宜習禮  
以續廟祀



中州名賢文表卷十八